



Ministarstvo za ljudska prava  
i izbjeglice  
Bosne i Hercegovine



Schweizerische Eidgenossenschaft  
Confédération suisse  
Confederazione Svizzera  
Confederaziun svizra



Empowered lives.  
Resilient nations.

**OKRUGLI STO „ŽENSKO PODUZETNIŠTVO U DIJASPORI I BOSNI I HERCEGOVINI“, 21.05.2015., Sarajevo, Hotel Sarajevo**

**KRATKE INFORMACIJE O PANELISTICAMA**

	<p><b>Fadila Pamukčić-Zečić</b>, modna kreatorica porijeklom iz Brčkog, čelnica je jednog od najuspješnijih svjetskih modnih brendova „Edor Creation“ sa sjedištem u Parizu. Fadila je u Francusku stigla kao izbjeglica bez igdje ičega ali je za vrlo kratko vrijeme uspjela svoj san o modnom blještavilu pretvoriti u stvarnost, radeći za najznačajnije modne kuće svijeta. Nakon preživljene ratne tragedije nastavila se boriti za opstanak svoje porodice. Angažirana je umjetnica, njene kreacije nose poruku i danas skreću pažnju na ono šta se dogodilo u BiH. Krpice su, često kaže Fadila, spasile njen život. Ona danas ima troje unučadi, a Pariz joj je kao rodno Brčko, navikla se. „Edor Creation“ brend sa kojim ova svjetski uspješna Brčanka nastupa u javnosti i diktira modne trendove u svijetu, je uspomena na u ratu poginulog joj sina Edina i brata Envera. Više informacija o „Edor Creation“ dostupno je na: <a href="http://www.edor-creation.fr/">http://www.edor-creation.fr/</a></p>
	<p><b>Nerima Šejtanić</b>, ekonomistica, suvlasnica je porodične firme „Adonis“ i „Selma Kjekken“ u Norveškoj i BiH. Prije rata u BiH je radila u Općini Čapljina. Nerima je oduvijek pokazivala veliki interes za poduzetništvom, a svoje ideje je najčešće uspješno realizirala. 1993. godine odlazi u Norvešku, a od 2006. godine djeluje u porodičnoj firmi „Selma Kjekken“. Nerima se uvijek trudila da raspoložive potencijale i resurse iz BiH poveže sa potražnjom u inostranstvu, što je bio i motiv pokretanja prizivodnje i uspostave firme za proizvodnju namještaja „Adonis“ Mostar. Firma se orjentisala na kvalitet i izvoz. Trenutno rade za tržište Norveške i Švicarske, a cilj je sklopiti poslovne ugovore sa Švedskom i Njemačkom. U Norveškoj posjeduje dva izložbeno-prodajna salona. Dobitnica je brojnih nagrada za kvalitet poslovanja. Više informacija o Nerimi dostupno je na: <a href="http://www.selma-kjekken.no">http://www.selma-kjekken.no</a></p>
	<p><b>Goranka Sarić Prevljak</b> je suvlasnica turističke agencije „Herzegovina Lodges“ iz Holandije. Diplomirala je arhitekturu 1990. godine u Sarajevu, a u Holandiji se našla tokom rata. Svoje znanje i iskustvo stečeno u BiH i Holandiji stavila je u funkciju očuvanja tradicije i promocije turizma u BiH. U sklopu njenog mini-kompleksa „Herzegovina Lodges“ smještenog tik uz Boračko jezero, nalaze se apartmani koji svojim šarmom i autentičnošću osvajaju svakoga ko posjeti ovo čarobno mjesto. Uz obilje turističkog sadržaja (izleti, šetnja po prirodi, brdski biciklizam i upoznavanje sa istorijom naše zemlje), „Herzegovina Lodges“ nudi i raznovrstan kulturni program (literarni, muzički, likovni i teatarski), čime je Boračko jezero dobilo vrlo kreativnu turističku ponudu. Više o Gogi i „Herzegovina Lodges“ dostupno je na : <a href="http://www.herzegovina-lodges.com/">http://www.herzegovina-lodges.com/</a></p>



**Amela Šehalić** se školovala u tri zemlje: BiH, Hrvatskoj i Njemačkoj. Danas radi kao direktorica „Agarthy Comics“, prve i jedine izdavačke kuće u BiH koja se bavi izdavanjem stripova, grafičkih novela i strip albuma. „Agarthy Comics“ se aktivno bavi promocijom strip kulture u BiH, te vrijednost Devete umjetnosti pokušava predstaviti na jedan od načina kako se to radi u svijetu - kroz školske biblioteke, potičući ljubav prema čitanju kod najmlađih. Amela je takođe i predsjednica Udruženja za podršku obrazovanja, odgoja, kulture i tradicije „Bajka“ koje okuplja iskusne, entuzijastične roditelje, odgajatelje, pedagoge i umjetnike, koji kroz kulturno-umjetničke i tradicionalne sadržaje žele dati autentičan pečat obrazovanju i odgoju u BiH. Više o „Agarthy Comics“ na: <http://www.agarthicomics.ba/>



Rođena Sarajka i više od dvadeset godina stanovnica Beča, **Selma Prodanović** je strastvena poduzetnica i filantropistkinja, koju često opisuju kao nekoga ko otkriva i povezuje poslovni potencijal (eng. *Business Angelina, Start-up-Grand-Dame*). Proglašena je jednom od najmoćnijih žena Austrije, za sebe kaže da je ostvarila mnogo više nego što je ikada sanjala a tek je na početku. Sa više od dvadeset pet godina profesionalnog iskustva u razvoju novog biznisa, kreativnim industrijama, strateškom marketingu, Selma je poslovno u svjetskoj špici na području poduzetništva i umrežavanja. Osnovala je uticajnu firmu Brainswork koja se bavi razvojem biznisa, inicirala IncredibleEurope 2049 i Austrijsko udruženje poslovnih anđela te uspostavila nagradu za posebno postignuće pod nazivom „*Brainswork – Make a Difference.*“ Selmina misija je da podrži 1 milion pojedinaca da postanu uspješni poduzetnici. Sretno je udata za svoju gimnazijsku ljubav i ponosna je majka dvoje sjajnih tinejdžera. Više informacija o Selmi dostupno je na: <http://www.selmaprodanovic.com/>



**Sana Alajmović** je članica Uprave, suosnivačica i izvršna direktorica firme Sigrid Therapeutics AB iz Švedske. Posjeduje raznovrsno iskustvo u razvoju poslovanja i upravljanja u oblasti biomedicinske industrije. Prethodno je radila kao šefica razvoja u firmi Nanologica AB, te kao menadžerica za razvoj poslovanja firme Serendipity Innovations Group i Švedsko-američkog samita u oblasti biomedicinskih znanosti. Sana je također radila i kao direktorica firme „Curitas“ koja se u okviru Grupacije „Procuritas“ bavi *venture* kapitalom, kao menadžerica operacija za Fondaciju „Chelha“ te kao voditeljica marketinga u Švedsko-američkoj komori u Njujorku. Diplomirala je u oblasti biznisa i ekonomije na *Stockholm School of Economics*. Dobitnica je nekoliko nagrada u Švedskoj, a vodeći švedski magazin *Veckans Affärer* Sanu je u 2012. godini svrstao među super talente u polju poslovanja u Švedskoj. Sana je inače rodnom iz Olova, a trenutno živi u Štokholmu. Više informacija o Sani dostupno je na: <http://www.sigridthx.com/sana-alajmovic>



Rođena u Sarajevu, **Nedžla Potogija** je školovanje završila u Njemačkoj gdje je kao arhitektica radila za mnoge poznate arhitektonske studije i automobilsku kuću Opel. Učestvovala je u brojnim projektima, kao što su proširenje aerodroma u Frankfurtu, koordiniranje 1.500 projekata Opelovih i Chevrolet salona ili redizajniranje dijela interijera Hotela Bristol u Sarajevu. Danas živi u BiH gdje je osnovala svoju kompaniju sa sjedištem kako u Sarajevu tako i u Wiesbadenu. Kompanija pod nazivom NPA STUDIO se bavi projektovanjem, od porodičnih kuća do velikih javnih objekata, ureda i redizajna enterijera do urbanog planiranja. Pored toga rade i obuku za energetski pregled i certificiranje objekata. Više informacija o Nedžli i firmi NPA STUDIO dostupno je na: <http://www.npastudio.eu/index.php/bs-BA/>



**Maša Čampara** je osnivačica „eMedia Patch“, digitalne agencije koja pruža sveobuhvatne usluge medijskog planiranja, upravljanja kampanjama i najaktuelnija konsultantska rješenja za *Online Publishere*. eMedia Patch trenutno zapošljava 15 ljudi. Najveći klijenti ove agencije su: AMCTV, WETV, IFC, Sundance Channel, Wikia, College Humor, Babycenter.com, Primo Media, Go2Mobi, Bustle and Lisa Hoffman Beauty. Prije osnivanja „eMedia Patch“, Maša je svoje prve poslovne korake napravila u Njujorku i to u kompanijama iVillag, NBC, MediaCom i Optimedia, radeći za poznate svjetske brendove poput Staples, Lancome, Cartier i Sanofi. Više informacija o Maši i „eMedia Patch“ dostupno je na: <http://emediapatch.com/>



**Senada Bešić**, rođena u Prijedoru, je predsjednica Bosanskohercegovačkog saveza žena u Švedskoj, osnovanog 1995. godine, i glavna urednica lista „Žena“ koji izdaje ovaj savez. U 2014. godini su u okviru Saveza bila angažovana 33 udruženja/sekcije sa 5.527 članova. Senada je novinarka, kolumnistica i pedagoginja, a od 1992. godine živi u Švedskoj. Autorka je novele „Pronađena sreća“ i knjige „Mi, dijaspora“, kao i dobitnica književne nagrade „Dr. Esad Sadiković“ za priču „Nekoliko slobodnih dana“. Više informacija o Bosanskohercegovačkom savezu žena u Švedskoj i Senadi Bešić dostupno je na: <http://www.bhkrf.se/bs/o-nama/>



**Aida Zupčević**, predsjednica Asocijacije poduzetnica u BiH „ONE“, je magistrica farmacije i vlasnica firme „Faveda“ iz Sarajeva. Njeno područje specijalizacije uključuje proizvodnju preparata na bazi ljekovitog bilja. Odlučna i energična žena sa visokim stepenom motivacije i sa svojim timom kontinuirano radi na polju edukacije žena u ruralnim područjima sa ciljem njihovog ekonomskog osnaživanja i podizanja svijesti o značaju zaštite prirodnih resursa. Više informacija o Asocijaciji „ONE“ i Aidi Zupčević dostupno je na: <http://one.ba/team-view/aida-zubcevic/>

**Naida Ribić** je predsjednica Bosanskohercegovačkog biznis kluba u Holandiji koji postoji od 2007. godine s ciljem saradnje u oblasti biznisa, poboljšanja transfera znanja, bržeg pristupa većim međunarodnim tržištima, istraživanja novih izvoznih alata i proširivanja mreža. Ovaj biznis klub je neprofitna organizacija i član je krovne organizacije Platforma BiH u Holandiji. U martu ove godine Bosanskohercegovački biznis klub i Ambasada BiH u Den Hagu bili su domaćini malog „Biznis foruma“ na temu „Partnerstvo bh. privrede i dijaspore: Dioničarskim društvom u budućnost razvoja ekonomije BiH“ s ciljem davanja jačeg impulsa partnerskim vezama između BiH i njene dijaspore. Više informacija o Bosanskohercegovačkom biznis klubu u Holandiji dostupno je na: <http://www.bihbc.nl>



**Slađana Simić** je diplomirana ekonomistica iz Tuzle, a trenutno radi kao menadžerica za razvoj projekata u „Akademika Net - pro“. Njeno prethodno iskustvo uključuje rad u institucijama Distrikta Brčko BiH, kao i rad za razne međunarodne organizacije. Jedna je od autora GEM izvještaja o stanju poduzetništva u BiH koji se implementira od 2008. godine, a nosilac projekta je Centar za razvoj poduzetništva Tuzla u partnerstvu sa Univerzitetom u Tuzli: <http://www.gemconsortium.org/docs/download/2296>



**Dženita Zirdum**, je novinarka i urednica serijala „Recept za uspjeh“ koji se od 2014. godine emituje na Javnom servisu BHT. Dženita je ranije bila urednica emisije BHT Euroimpuls, a dobitnica je i nagrade „Evropski tv program i novinari BiH“. Ova emisija se, pored aktuelnosti iz Brisela, informacija iz zemalja članica EU, ali i onih koje su na putu da to postanu, bavila i aktivnostima koje BiH provodi na putu ka EU.



**Aida Daguda je** direktorica Centra za promociju civilnog društva (CPCD). Posjeduje respektabilno znanje o civilnom društvu i neprofitnom sektoru u BiH i u regionu i ima više od 18 godina radnog iskustva u međunarodnim i domaćim nevladinim organizacijama. Pokrenula je “mentoRING”, najveći mentorski program za žene u BiH, te nekoliko regionalnih inicijativa u regiji Zapadnog Balkana. Aida je ekspertica u oblastima razvoja i upravljanja projektima, građanskog aktivizma, sistema osiguranja kvaliteta za nevladine organizacije, društvene odgovornosti preduzeća te u ocjenjivanju i vrednovanju projekata EU. Opredijeljena je za otvoreni dijalog, ravnopravnost spolova i aktivno sudjelovanje u procesu razvoja demokratije u BiH.



**Lejla Kusturica** je menadžerica za filantropiju u Fondacija „Mozaik“, osnovanoj 2002. godine s ciljem podsticanja razvoja ruralnih zajednica. „Mozaik“ je jedna od značajnijih društveno poduzetničkih organizacija u regionu, čija je vizija ekonomski i društveno jaka BiH.

**Vernesa Đip** je voditeljica programa Evropske banke za obnovu i razvoj (EBRD) u BiH. Nakon studija u Dablinu Vernesa je doktorirala u oblasti poslovnih studija i menadžmenta na Ekonomskom fakultetu u Sarajevu. U okviru rada EBRD-a Vernesa je učestvovala u realizaciji projekta „Žene u biznisu“, namijenjenog ženama direktoricama koje su započele ili već imaju osnovane kompanije.